

## 品凡詩抄

### 踏青賞櫻

危橋渡靄烟，細涓入清淵。綠徑人難至，寒山影自憐。紅櫻飄碧樹，翠鳥語深泉。日夕雲嵐起，徘徊已忘還。

### 春遊

斜風細雨柳條輕，空谷幽山翡翠鳴。遠眺曲谿櫻斷道，綠苔卻坐小溪清。

### 杜鵑花

春暖稍稍雨色濛，和風遙過玉枝豐。花繁蕩漾殘香落，飛捲亂紅入矮叢。

### 中大湖

二月映深泉，姍姍起水烟。松濤傳遠處，垂柳點清漣。

### 中大湖後記

〈中大湖〉作後一年，學校在中大湖畔建新系館，景色與昔日有別，因嘆而作。飛揚塵土使天蒙，往日清漣轉瞬空。遠處松濤聲如舊，深庭木椅景不同。徒嗟細柳晴烟裡，卻憶涼亭皓月中。萬古衰榮更迭易，今朝獨立倚楓紅。

### 觀桐花

層雲滯碧峰，細雨白桐濃。綠草埋幽徑，砌下雪數重。

### 暫居山寺

古刹疏鐘梵唄稀，獨身出外掩柴扉。空濛翠靄侵幽徑，料峭殘風拂人衣。月落雞啼天欲曙，雲開風動絮又飛。朝陽一輪依山勢，芳草青青夜露晞。

### 山夜行

晚上翠林岡，星稀夜色涼。月高棲柏樹，露重溼衣裳。流水經石底，落葉點水央。悠悠閒此意，獨坐盼朝陽。

## 夕日

渡頭殘日倚山斜，風動黃蘆雁落沙。遠處炊煙催晚景，風波浩淼見天涯。

## 午後漫遊百花川

天涯一孤鷺，未料之何地。小徑自蕭條，木落涼颼至。春寒仍未盡，花凋無人識。殘紅隨水去，澗急杳然逝。天地一逆旅，萬古同塵墜。人生幻似夢，奄忽如馳驥。且顧書卷裡，聖賢多顛躓。高樹多悲風，今朝擇趨避。

## 八月既望賞月

舞榭歌窈眇，人生復賦狎。徘徊松林間，沉吟心意愜。夜露沾鞋襪，秋至涼颼脅。銀輪自清冷，慵疏閑雲疊。小川花寂歷，殘葉棲孤蝶。葳蕤芳草長，奄忽枯枝插。滄海桑榆影，世事無定協。春秋有更迭，未央不足法。良辰勤珍惜，月色照衣袂。

## 鄉間觀蓮

洲渚忽云暮，日夕過林杪。縈迴渡溪橋，田野蕪水蓼。靈華生碧池，歸陽佇丹篠。清冷無纖瑕，幽然出淥沼。流馥延南畝，荷香久繞繚。沉吟且自樂，巖穴入飛鳥。此地信爲美，未料知者少。今朝久淹留，難得離紛擾。

## 向晚登山

柔風挾薄霧，絲絲侵林杪。人歸青山暗，忽覺天地渺。零零桐花落，寂寂澗邊草。人生寄一世，譬如朝露杳。閭浮本無涯，蝸角所爭小。盤古何曾見，彭祖倏忽夭。何必逐煙塵，且坐觀林篠。

## 居山聽雨

山嵐新雨晚來秋，散卷孤燈獨登樓。瓦舍響聲疑碎玉，低簷垂滴擬疏旒。深林鼓噪蛙依舊，陋巷悲嗥犬未休。當路機心常堪折，安居逸樂復何求？

## 雨日遊碧潭

遙風遠水草含煙，馳景頽波巖近淵。杳渺危橋凌峽岫，縈迴幽徑繞崖巔。雲移疊嶂忽逢雨，人去孤舟獨對天。莫道泥途連困頓，陋蓬雖小亦堪眠。